

拖住我隻手，得唔得呀？

作者: 童星點心飯

Powered by [紙言](#)

第一章：拖住我隻手，得唔得呀？

第一章：拖住我隻手，得唔得呀？

「拖住我隻手，得唔得呀？」

輕輕既一股風吹過，旁邊既樹葉都被吹到「沙沙」作響，而喺朦朧之間我見到有一個黑色長直頭髮既女仔喺我面前伸直佢隻手，個嘴雖然細但係笑容就非常搶眼。呢個女仔既頭髮長到落條腰到，個身就著住一件淺紅色既恤衫同一條黑色碎花既長裙，望落應該係一個充滿氣質女仔。但係我無論點都好都只可以睇到佢喺到笑，嘴以上既部分就白朦朧一片，呢個女仔個樣到底係點我就完全望唔到。喺呢個女仔既身邊好似係一個小巴士，而每次有小巴到小巴士既時候都會有一大班人湧住去架小巴到，十足十個啲Fans要追明星咁款。

我諗正常人一時之間見到咁多奇怪既事應該都會問好多問題，但係唔知點解我個腦入面居然完全冇諗過呢樣野，個身好自然咁應呢個女仔既要求伸手去拖住佢隻手。

但係正當我捉住佢隻手個一刻.....喂，唔對路喎，點解好地地一隻手會有咁多毛既？多到一個地步係好似頭髮咁囉。而喺呢個時候，我見到呢個女仔個嘴由本來既合嘴微笑再次張開，似乎係要同我講啲野咁。

「哥...哥哥.....你唔好咁啦，搞到我好痕呀。」

哥哥？你講乜野呀？我幾時多左個長頭髮既妹妹架？冇錯我係有個妹，但係佢啲頭髮頂盡都係去到膀頭到，唔會去到腰到囉。

就係呢個女仔莫名既一句說話令到我成個人立即清醒返，擘大對眼一睇先知原來我隻手喺咁摸住我個妹個頭，剛才我見到既一切都只不過係夢境。雖然話就話呢個係一個夢境，之不過我真係覺得真實到有啲離譜。

其實呢個夢我由上年開始就晚晚都夢見，之不過次次一去到我伸手去到嗰個女仔到既時候就會醒咗，搞到我永遠都睇唔到個女仔係乜野樣。

不過話時話，好彩我頭先隻手只係拍左落阿妹個頭到嗰，如果我拍落少少既真係比佢打到呢世訓喺呢張床到都似。

「哥哥你想摸到幾時先停手呀？媽咪已經煮好早餐啦，快啲出嚟食啦。」

「阿樑你仲想訓到幾時呀？你唔係諗住第一日返學就遲到下話？暑假完左好耐啦！」

「唔怕啦阿媽，有排都未係時候啦，唔信你望下個月曆。」

我抬頭望一望個月曆，立即成個人O咗嘴，原來今日已經九月一號啦！點解可以係時候返學都一啲印象都冇架？我呢啲真係放假放到成個人懵左，連自己要返學都唔記得，我諗呢個世界上都唔會有幾多人痴線過我架啦。不過咁又係既，鬼叫個假期又真係咁長咩。

自從上年DSE放左榜之後，我就一日到黑都留喺屋企冇野做。因為我個分又唔夠入大學，讀副學士之類阿媽又話冇乜野用，結果最後就喺屋企人要求既情況下入左一間新既學校到重讀多一年中六，睇下冇可能今年考得好啲啲。不過其實又邊有可能先得架，我讀書成績一向唔好，而且我都唔中意讀書既，就算讀多年又點先？不過既然係佢地要求，咁我唯有去讀既啫，都係求其讀多年應付下佢地算數。

「今日第一日返新學校呀，點可以遲到架。」

「得啦，我記得點樣去既，之前都試過去啦，坐巴士好快就到架啦。」

「駁嘴你就叻，你好快啲食完然後返學呀。」

「得啦阿媽……」

好明顯我呢一個反應係求其到冇得再求其，不過阿媽咁講其實都啱既，始終第一日返新學校就遲到既真係唔太好睇。食完早餐之後我就絲絲然咁出左門口。

果然天有不測之風雲，我係個不幸的人！我一去到個巴士站就望住自己架巴士開走，等左十分鐘之後先上到第二架。本來以為呢啲事只會遇一次啫，但係今次架車就爬爬下山死咗火，結果我要等第三架車先得，去到學校既時候得返兩分鐘就遲到。

我一落左巴士之後就一直喺到跑，跑到學校門口既時候門口道大閘就快要門埋，我望住嗰道大閘一直跑，但係似乎喺門口既訓導老師心入面並無一刻諗過放寬比我慢慢行入去，而係用依舊既速度門閘。而喺呢個時候我幾乎成為左一個熱血棒球少年，以呢道大閘後面既空地作為我既一壘飛身撲過去。

雖然撲到去既時候連眼鏡都飛埋出去，之不過我最後都好好彩咁趕到喺八點半之前入到學校到，都叫做冇遲到，SAFE。

「呢位同學，今次算你好彩，不過你下次就知味道……哼。」

嘩呢啲乜野老師嚟架，咁講野都有既，雖然聽講老師呢份工唔易做而且好大壓力啫，但係都唔洗咁講野架下話。如果我唔係跌左副眼鏡睇唔清楚野既話我一定會認住你個樣，然後搵日去捉你痛腳，然後要嚟向我道歉。

不過呢.....眼鏡呀眼鏡，你到底去左邊呀？我宜家望親乜都係一pat pat咁，真係好麻煩呀。

「同學你冇事呀嘛？有冇跌親呀？」

喺呢個時候我聽到一把好甜既聲，聽落應該係一個女仔嚟。

「冇...冇事。」

到底呢個女仔係乜野樣我真係唔知，之不過就算我望過去都只會係一pat野，都係等我快啲汁返副眼鏡先算。

「你係唔係搵緊呢樣野呀。」

「乜...乜野呀？」

我諗佢應該係幫我拎返副眼鏡掛，但係我都睇唔到佢拎住啲乜。唉，大近視有時都真係幾麻煩。

「你係唔係大近視呢，唔緊要啦，等我幫你戴起佢啦。」

而喺佢幫我戴返副眼鏡既時候，就見到眼前出現左一個黑色長直髮既女仔，皮膚好白，白到十足十個啲電視到見到既模特兒咁款。佢著住一條呢間學校既白色連身裙，右手拎住一本外國既翻譯小說，心口到掛住一個寫住風紀既牌，我諗佢大概係負責捉人有冇遲到掛。

呢個時候我仲係成個人扒左喺地下到未起身，然後呢個女仔就烏低左個身望住我，笑笑口咁嚟到望住我。

「你起唔起到身呀？拖住我隻手啦？」

點解呢句野咁熟既.....

第二章：我最期待的畫面出現了。

第二章：我最期待的畫面出現了。

「你點呀，起唔起到身呀？」

「我有問題既，唔該你。」

我眼前呢個女仔個身材都算係唔錯，而喺呢個時候仲要烏低左個身望住我，搞到佢領口位嗰到跌左落嚟，嗚呀，我幾乎可以睇到佢校服入面係著左啲乜野款呀。雖然睇佢個表情應該係冇心咁show出嚟，但係大佬你叫我望邊到好呀？講比你知我望到你入面既話你實會以為我係一個變態佬啦。

我試圖望向其他地方，希望咁做可以令我唔好只係將注意力集中喺同一個位到。

咪住先，佢呢一個動作咁似我一直以嚟發夢見到既情節？！雖然旁邊有一個小巴士站，但係呢個同學比我既感覺真係同夢入面嗰個女仔差唔多一樣。

「咦，你成塊面都紅曬喎，冇冇事呀？」

你個身烏到咁前，我唔面紅就有鬼啦！不過話時話，呢個女仔個心口.....唔係，係成個人真係有一股好大既吸引力，緊咁將我個心吸住左。喺不知不覺間原來我個人只係顧住望實呢個女仔，即使成個人依然係仲係訓係地下，但係我個腦入面依然未有起身既念頭。

唉，雖然我都好想留喺呢到望多一陣，但係如果遲咗入班房既話萬一比老師問起既應該都會幾麻煩，都係等我快啲入去先，反正喺同一間學校入面點都會有機會再見到佢既，反正生命滿希望呀嘛。

我今年重讀既呢間學校位於炮台山，我諗大約算係band 1中掛，之不過其實間學校係咩級數又點呢？唔通我入到間勁既中學就一定會考得好個公開試咩，傻的嗎？如果我唔讀書既你幾高級都奈我唔何啦。

喺我入左間課室一陣之後，一個肥佬慢慢行咗入班房入面，到底呢個肥佬係咩人嚟架？班主任？訓導主任？不過點都好啦，既然頭先門口嗰個老師都可以串成咁，我對呢間學校既老師質素已經有唔太好既印象。

「各位同學好，今年又係我楊sir做你地既班主任，大家多多指教呀。」

原來呢個肥佬講野都幾客氣喎.....咩話，佢就係班主任？！

「今年我地呢到會多左一位新同學，叫做阿樑，大家要好好相處呀。阿樑不如你起身做個自我介紹先啦。」

之後呢個楊sir指一指我，示意我要起身。

「大...大家好，我叫阿樑，多多指教.....」

就係我用兩秒都唔洗既方式做完自我介紹之後，有個人突然開左我地班既房門衝咗入嚟，原來就係頭先喺樓下嗰個女仔。佢睇落應該係全力跑過嚟，因為我見佢成塊面比起我頭先喺樓下見到既更加紅，而且佢成個人氣來氣喘咁。不過到底點解佢要跑得咁快呢？

「唔...唔好意思呀，頭...頭先風紀嗰邊有野做搞到遲左.....噢，你咪係頭先嗰個人，點解你會喺到架？」

「呢位係今年既新同學阿樑。」

「我係阿樑，你好。」

「你好呀，我叫希文，希望個希，文化個文」

嘩，希文呢個名咁有意思既？！我個名只不過係我呀媽諗唔到名所以求其喺本字典到拎嚟用架啫，入面一啲意思都冇囉。喺呢個moment我覺得自己喺某方面輸左，仲要輸得好應。

「好啦，你坐返埋位先啦。嗱，今年我地會有一個新少少既上堂方法，就係要分組上堂，即係話你地要以一組組既形式去上堂。咁學校就希望同組既同學可以多多交流，如果你地有唔明既野都可以立即問同組既同學，老師認為咁樣你地就可以學得好啲。」

乜呢間學校好搞唔搞，偏偏要搞啲乜野分組上堂呀？明明係最後一年就好心比我地求其讀啦。宜家仲扮曬好人話咩同組同學交流可以學得好啲，計我話你班老師係唔想我地有問題就走去問你，驚麻煩到你之嘛。嘩，人性的光輝呀，老師既道德呀.....OK，明囉。

「咁開始分組啦。第一組，子軒，希文，卓珊，阿樑同阿傑。你地最後一年就要一齊讀啦，知唔知？」

呢個時候希文對住我笑左一笑，同我揮一揮手。

「今年要你多多指教啦，阿樑。」

聽到呢句說話之後我成個人緊張到都唔知點回應好，我只係有樣學樣咁揮一揮手之後佢就擰轉個頭同其他同組既同學打招呼，而我就除左傻笑之外就唔知做咩好。真係估唔到一開學就可以同呢個一個咁愛既女仔一組，嘩，真係人性的光輝呀，老師既道德呀。

真係老套啲都要講一次：我最期待的畫面出現了！

第三章：做學生邊個中意測驗架？

第三章：做學生邊個中意測驗架？

開學頭幾日一向都係交代下一啲無聊野，都係派下嗰啲乜野買校服既回條之類無關癢既野，到左下個星期一先至正式開始上堂。

呢幾日我同組入面既人開始有唔少既交流，對佢地既事亦都有咗初步既了解。希文唔洗介紹當然係我女神啦，靚得嚟又份人又親切，我幾乎每日望佢多過望個老師；至於卓珊呢就係希文既好姊妹，好似係由小學開始已經同一班，同希文比起嚟份人就係屬於好活躍嗰類，成日都參加形形色色既運動；子軒就係一個咩事都好認真既人，雖然表現就唔係話好突出，之不過佢做野唔馬虎呢樣野的確係有目共睹；最後就阿傑，佢係一個好典型既毒男，呢幾日嚟同佢講唔夠十句野，下下問佢野只可以用一句答完，老實講我真係唔知佢個腦係係到諗緊乜。

我地分組既方法其實係依照同學讀既科嚟將唔同既同學分組，好似我地呢組咁，除左中英數呢啲主科之外，我地全部人都係讀經濟，地理同歷史，所以無論我地上咩堂都會係埋一齊。咁樣上堂怪就怪咗啲，之不過可以任何時候都見到希文，對我嚟講當然係非常好啦。

不過雖然可以每堂都見到佢，之不過呢間學校既堂真係好悶架，啲老師又中意對住本書照講嘞，每次上堂就開始講，講到落堂，真係完全冇為我地呢班學生著想過，搞到我週不時都頂唔住訓著。由其係一到左歷史堂，個Miss把聲又難聽嘞，上堂又一味吹水，我真係鬼唔望快啲喺本歷史書入面見到佢個樣。

不過好彩每次我就嚟訓著既時候希文都會拍一拍我，叫我起身，佢呢種關懷備至既性格真係令我對佢更加入迷。

某程度嚟講，我宜家返學真係單純咁為咗見到希文既佢，有時我什至會特登趁上堂嗰時扮訓覺去引佢嚟叫我起身。我覺得每一日返學都令我地之間既關係變得愈來愈親近。

宜家已經開左學兩個星期，我又如常喺上堂既時候望住希文。之不過今日有啲奇怪，我硬係凝住有人喺到望住我咁，但係當我拎轉個頭望下後面，結果都係一啲特別都冇，唔通係我既心理作用喺到作怪？不過既然發現唔到啲咩咁就算啦。

到咗今日數學堂落堂既時候，數學老師陳sir無啦啦話我地下星期要測驗嘞。重讀中六就係有樣野唔好，就係學校為咗公開試就比一大堆測驗去谷同學讀書，對於我呢啲只係因為父母要求先至嚟讀既人真係幾難搞。不過我都係諗住求其考下算嘞，反正我都冇心去考既，只要最後出嚟個分唔好太差就得。

但係希文佢就唔同講法，由佢聽到要測驗嗰一刻對眼就好似著咗火咁，睇嚟佢係嗰啲好睇成績既人嚟。不過算數啦，俗語都有話船到橋頭自然直呀嘛，所以我都係由得佢，順其自然。

之不過我自從上年考完試之後就有掂過本書，宜家又抱住啲咁既心態做測驗，個結果出到嚟又點會好先得架？肥佬呢家野就梗架啦，之不過我真係點都估唔到自己可以一百分先拎得三分，我一直以為係得漫畫入面啲情境先會見到啲咁既野。

「唉呀，我今次先得三分啫，真係估唔到今次既測驗會係咁難架。」

我如常咁同希文講野，之不過我見佢成塊面黑曬，個頭冇望過嚟我到，到底發生咗啲乜野事呢？佢之前一聽到我同佢講野就會立即拎轉嚟望住我嚟答我，點解佢今次既反應會係咁既？佢之前聽到話要測驗既時候成個人都好有衝勁，但係而家就好似好失落咁，唔通佢既成績唔太好？如果係咁既我一陣一定要去安慰一下佢。

「今次同學既表現唔係太好呀，要比啲心機知嗎？老師對你地好有期望架。」

好彩今次個個都表現得唔太好，咁即係我個分應該都唔係太大問題啫。

「之不過亦都有同學拎滿分啲，就係希文啦，大家比啲掌聲佢啦。」

吓，滿分？！咁點解佢仲要咁黑口黑面呀？

第四章：有啲說話聽完仲痛過比人打

第四章：有啲說話聽完仲痛過比人打

就係我好神奇咁拎到三分之後，呢件事已經迅速傳到全級人都知道，呢啲野明明係天機不可早洩架嘛，冇冇搞錯呀！不過同時係我拎左三分之後，希文佢基本上冇再同我講過一句野，無論我點樣好似之前咁聊佢傾計佢都唔比反應我。宜家除左必要既對話之外我地就冇再傾計。

如是者過左一星期，又到咗要數測驗既時候。為左防止我又考到個咁既分數，我唯有溫下書啦，不過唔知係唔係因為考完DSE放得假太耐，所有學過既野都全部還返曬比之前嗰間學校既老師，就算你比我望住本書考試都未必會考得好。當然今次既結果都唔會好得去邊啦，雖然唔再係三分，但都係唔合格。

不過希文對我既態度似乎並冇一絲好轉，反而好似更加唔理我。之前就算佢點唔答我都好都會望下我，就算冇叫我起身都會睇老師到之前拍下我提我起身，但係而家簡直係完全唔理我，即使見到我都刻意行第二條路。死啦，係咪我唔知幾時激翻左佢呀？

但係我諗天無絕人之路既，因為十月頭嗰時我地成組人就會一齊去灣仔到做個有關香港地區Project既資料搜集，到時我地一組入面會分成唔同小組行事，我同希文就剛剛好編咗入同一組去做實地考察，我諗到時一定可以氹返佢既。

我覺得要氹一個翻咗既女仔最好既方法應該係搵一啲有趣既野引返佢笑，所以只要我決定如果沿途見到有乜野好笑既野我就立即話比希文知，希望咁做會有啲用掛。雖然佢開頭都叫冇理下我係咁依望一望，之不過後來只要聽到我講之後就會加快腳步行開。

大件事！唔通今次我又做錯咗啲乜野？

我一路跟住希文佢後面行，每行一步我就會變得更加心急，好想快啲諗到啲乜野方法可以去氹返佢。無奈我呢個人的確係諗就天下無敵，做就無能為力。喂，冇冇人可以幫下我呀，我覺得我女神真係好難觸摸呀！

之後我地行下行下去到有「玩具街」之稱既太原街。

叫得做玩具街，入面一定有好多得意野掛？係咁既我實搵到一樣野去氹佢既。

我就係條街到邊圍望，望下有冇啲乜野有趣既野；而希文佢就如常咁一路影下相，做下訪問，雖然我地兩個人係行埋一齊，但係我地一句野都冇講過。其實我對呢條玩具街都真係幾失望，本來諗住係到可以搵到啲得意野，點知周圍都係得啲小學雞係到買彈珠人。而係不知不覺間我地就行完條街，資料搜集亦告一段落.....

「係啦，不如一齊去食晚飯呀？」

「唔啦，我要返屋企。」

希文依然係望都冇望我，只係用冷淡既語氣簡短咁拒絕咗我既邀請。佢咁樣既回應令我心入面既疑慮變得愈嚟愈複雜。

「咁不如我送你返屋企啦，反正時候都唔早，女仔人家一個人返去可能會有啲危險。」

之後希文佢一句野都冇講，只係好輕微咁點左一下頭。

之前希文對我既態度仲未係咁惡劣既時候我都已經試過送佢返屋企，因為我同佢同佢都算住得幾近，都係篤篤灣個一頭。咁當然名義上我會話係因為順路先會送佢返屋企，但係實際上梗係為左可以見多佢一陣。

我地由灣仔一路坐巴士返去，雖然我地係一齊坐喺雙人位到，但係佢就全程睇實個窗，理都唔理下我，而我又唔夠膽去同佢講野，結果全程一片沉默。冇錯雙人位係可以令兩個人既距離變得近咗，但係呢一個距離只不過係物理上既距離，我同佢心入面既距離可能已經係不知不覺間變得莫名咁遠。由我同佢講完要送佢返屋企之後我地就一直都冇講野，去到後來落咗車行到佢樓下都一樣。

去到臨道別既時候，我終於都忍唔住，決定要去問清楚到底點解佢對我既態度會無啦啦由學期初咁親切變到今時今日咁樣。如果我地既關係一直都係咁唔清唔楚既話我一日到黑個心都唔會舒服，亦因為咁我好想去問清楚佢既諗法係點。

「希...希文，你之前唔係都會同我講下野架咩？點...點解你最近...對...對我啲態度好似...好似冷莫左咁多既？」

我講既時候成個人唔知點解變得好緊張，明明自己平時講野都唔會咁窒，話唔定喺我內心深處其實係怕自己會聽到一個最唔想聽到既答案。

喺我講完既時候，希文佢終於拎轉個身，對眼又好似當初識佢咁望住我而唔係望咗去其他既地方，呢個時候既我以為情況終於都有好轉，但係事實證明我諗得實在太天真。

「阿樑，我最近發現左原來我真係好憎你。」

第五章：點解會咁架？有冇人可以解釋下？

第五章：點解會咁架？有冇人可以解釋下？

「阿樑，我最近發現左原來我真係好憎你。」

老實講，佢呢一句說話真係hurt到我應一應，所以話有時文字既殺傷力真係好比一把利劍。女神開到口話唔中意我，我覺得自己既心情真係灰到同燃燒殆盡差唔多。

「點...點解呀？」

「我開頭仲以為你係有決心考返好個考試先至會嚟重讀，之不過原來一切都係我嚟到自作多情。你諗下你之前個測驗，三分，係三分呀！如果你有溫下書既都唔會考成咁啦下話。好似你呢啲做事咁唔認真既人我就係最討厭架啦！」

「咁.....」

其實我真係好想反駁佢，之但係佢又的確講得一啲都冇錯。我入嚟呢間學校讀書只不過係為左應付我阿媽，根本冇諗過要考返好個考試既，咁我又點會有心機讀先得呀？而且我冇用心考個測驗係事實，我考得三分又係事實，聽到佢咁講之後我除咗望住個地下之外就真係唔知比咩反應好。

「你唔好再送我返屋企，如果非必要我都唔想見到你。」

希文講完之後就頭也不回咁直接返咗上樓，而我就一個人呆咗咁一直企咗嚟到。

去到第二日返學，我地好似之前咁一樣見到面都冇講野，我知道自己喺佢面前講野都只會令到佢更加髒，所以都冇主動咁去搵佢。而喺呢個時候，同我同一組既子軒笑笑口咁行咗過嚟。

「點呀阿樑，你呢幾日好似冇乜點同希文佢傾過計嚟喎，係唔係比佢話成績差唔中意你呢？」

「你...你點知架？」

「你有所不知啦，諗下都知啦，佢個樣又唔差，身材又好啱，成績你都有眼睇架.....咁既條件，年終都不知有幾多好似你咁既人中意咗佢。」

「吓.....乜...乜野中意呀，都唔知你講乜。」

呢個時候我感覺到塊面變得好熱，應該係因為我塊面宜家紅曬掛。冇錯我對希文係好有好感，但係咁都唔洗咁直接講話我中意佢架嘛，不過其實我都...都...唔知係唔係中意咗佢.....

子軒望到我塊面之後拎一拎頭，然後微微一笑，成個世事都比佢看透mode咁，然後又住對手放係胸前。

「不過點解希文佢宜家仲係單身呢？咁即係證明嗰班追佢既人都.....你明架啦。」

「之不過你點知佢因為我成績差而唔中意我架？」

「我亂吹之嘛，嘻嘻。」

「吓.....」

講真我除咗吓真係唔係講咩好，咁都比你吹得中，有冇咁好彩呀？子軒我一定會認住你，等遲啲你同我都夠十八歲我一定拉你去馬會買返次六合彩。

「講笑喳。不過聽講話希文佢屋企家教其實好嚴，如果成績考得差少少就會比人鬧而且冇晚飯食，所以佢由細就覺得成績就係一切，見到有人唔比心機讀書就會討厭佢地。」

「原來希文既背後係有個咁既故事既.....」

「咁你又點呀，你係唔係諗住放棄先？定係你諗住繼續去追佢呀？」

「唔放棄又可以點先.....咪住！我幾時有話過你聽我要追佢呀？你唔好亂諗啫。」

「同你同一組咁耐又點會估唔到你諗乜先得架？你日日上堂時時刻刻都淨係識望住希文就知你乜野事啦。」

唔通我上堂嗰時感覺到嗰種比人望住既感覺就係子軒？咁都好啲，等我仲以為係唔知乜野靈異野添。唉，不過都唔知仲會唔會有其他人都望到我咁做先得架。

「咁...咁我宜家有咩可以做呀？」

「呢啲時候就應該對症下藥，千祈唔好行差踏錯。」

「咁即點呀？」

「咁都唔明？！你真唔明定假唔明呀？」

「嗯.....」

「即係比啲心機讀好啲書囉傻仔。」

講完呢句之後子軒佢就跳下跳咁行開咗，個樣好似期待住啲唔知乜野咁。不過我都冇咩時間去諗點解佢要嚟解釋咁多野比我知，我都係快啲諗下有咁野方法可以令希文冇咁討厭我仲好。宜家只要我一諗起佢之前話好憎嗰個情況我就真係想喊出嚟啦。

不過到底點做至好呢？係唔係要成績有返好轉呢？之不過我又點知下一個測驗係幾時嘞，唉，真係愈諗愈頭痛。

唔係嘞，如果講最近既話應該有一件事可以用嘞。

其實我都唔知自己寫成點，得既話大家介唔介意留下言比啲意見我呀？

btw, 因為都係時候開學, 更新既時候會慢啲, 希望大家見諒
同埋覺得好睇既記住要介紹比朋友呀 :)

第六章：呢個女仔叫咩名呢？

第六章：呢個女仔叫咩名呢？

如果我可以喺今次呢個Project到幫到手既話咁唔知佢會唔會原諒我呢？不過其實都唔到我諗可唔可以啦，根本就得返呢一個機會，而且呢一個機會仲好緊迫，因為得返三日就要Present啦。

不過我都係要了解多啲個Project多啲先得，始終之前嗰次資料搜某程度一直都喺到Freeride，實際上我要做乜野都唔知。我諗都係去多次灣仔到影下相同做多幾個訪問先啦，反正之前嗰日我一路都只係諗住要氹返希文，根本就冇好好留意下自己要做既野。

不過講開又講，如果我要做既話我就一定唔可以馬虎。一份求其做出嚟既Project有邊個唔識整呀？如果唔可以比希文佢睇得出我既意既話根本一啲意義都冇。

開頭我都只係去下嗰啲好典型既舊區境點，即係嗰啲咩藍屋呀，舊街市之類。不過其實嚟嚟去去咪又係嗰啲，好難做到可以好突出架啲，唔通真係冇其他方法？

不過我見自己都行咗成個朝早，行到個人都有啲口渴，咁啱行過一間唔係好大既士多，最後就走咗入去睇下有冇乜野好飲。

呢間士多話大就真係唔係好大，始終香港地啲鋪租咁貴，啲鋪頭大極都有個譜。從外面望入去真係好暗，我諗大概係因為宜家正值中午想慳返啲電費掛，不過就係因為咁暗反而喺條街到突顯出嚟。門口只係放住啲好普通既飲品，都係茶字典同可口可樂咁，不過令我估唔到既就係佢個價錢居然可以維持到我細個嗰時咁賣到三四蚊一支。我開頭都只係為咗買野飲先至入嚟，但係入嚟呢望下嗰到望下，唔經唔覺居然望到入曬神，幾乎連自己點解要入嚟都唔記得。

「阿樑？你係唔係阿樑呀？」

無啦啦聽到一把女仔聲喺到講野，仲要似乎喺到確然緊我既身份。我由本來望呢間鋪望到入曬神既情況立即抽離咗返嚟，由眼前既一箱可口可樂到抬頭一望，居然發現咗一個幾熟口面既女仔身影，扎住一條短短既馬尾，戴住黑色既粗框眼鏡，著住一條粉紅色既長裙。

「咦，你係.....呀...呀.....」

「我係阿玲呀，不過你叫唔出我個名都唔出奇既，反正開咗學咁耐我都未正式咁同你傾過計。」

呢個阿玲就係我宜家呢間學校既同班同學，不過因為我地唔係同一組，所以我都有乜野機會可以同佢傾到計。睇見阿玲佢講野既時候眉頭一皺，然後講得愈嚟愈細聲，睇嚟好似因為我唔記得佢個名而唔開心咁。

「好對唔住呀，我有心架。」

「唔緊要啫，我...我都有介意。」

唔知係咪因為佢同我唔係好熟既關係，佢講野既時候塊面好似有啲泛紅，個頭唔係望到好高，睇線大約只係去到我條腰到，講野又有少少窒窒地，總之就係一副怕怕羞羞咁，喺旁邊睇其實都幾可愛。

「係呢點解你會喺到既？唔通你都係用灣仔作為我地Project既主題？」

「唔係，我地嗰組係...係選擇旺...旺角。」

「咁點解你會喺呢間士多出現既？」

「咁係因為呢間鋪係我屋企開架，而我就住喺呢頭。」

「原來係咁.....」

「喺呢，你...你係唔係要買野呀？我計你平啲呀？」

「咁又唔係幾好意思既，其實你地呢到啲野已經比出面既平架啦，由得佢啦。」

「咁好啦。」

阿玲佢講完之後塊面又再次紅曬，然後個頭側一側咁喺到笑。我拎起一支茶字典之後遞過手上面既錢比佢，佢慢慢伸出雙手接住，數完之後就放咗入收銀機入面。

「你想用用灣仔邊...邊到做Project呀？」

「邊到呀？其實我都未諗到架，我見嚟嚟去去都係嗰啲景點，好似冇咩新意咁。如果有啲好似呢到既小店呢咁就最好啦。」

「咁如果你唔介意既話.....我...我.....」

之後我見到大力吸咗一口氣，大力到兩隻眼都會埋咗，好似係想講一啲好重要既野。

「不如我帶你去行下灣仔啦！」

雖然佢講呢句野既時候唔係話好大聲，之不過係我見到佢咁耐佢最大聲既一下。老實講我都有少少比佢嚇親。不過既然有個喺到住既人帶我行啫，我緊係應承啦。

「咁就麻煩你啦。」

「唔緊要.....」

就係咁我同阿玲就一齊嚟灣仔到行嚟行去。

順便嚟到祝埋大家中秋快樂
我諗宜家更新既時間會係一星期一次左右
希望大家可以比啲意見同埋推介比朋友睇, 有勞了 (笑)

第七章：行行行，灣仔入面係咁行

第七章：行行行，灣仔入面係咁行

就係咁，阿玲就開始帶我嚟灣仔到左穿右插，只係行下大街旁邊比較少人行既小店。一路行既時候我隱約見到阿玲既步伐有時係跳下跳咁，好似心情唔錯。由士多到開始行咗大約五分鐘之後嚟到一間文具店，店入面有一個著住白色背心既中年大叔。

「阿叔，你得唔得閒呀？」

「喂阿玲，你最近點呀？咦咁好帶埋男朋友仔嚟呀，士多老闆實開心死啦。」

就咁聽落似乎呢間文具店既阿叔應該同阿玲屋企人有啲交情，所以佢先敢膽對住阿玲講啲咁既說話。而阿玲佢聽完呢個阿叔既說話之後塊面又紅曬，之後佢伸隻手指放喺佢桃紅色既嘴唇到，希望阿叔唔好再講落去，阿叔望到之後個人就係咁嚟到笑。

「對唔係呀阿樑，叔叔佢一向都...中...中意講笑，佢冇...冇心架，你千祈唔好介意呀，真係唔好介意呀。」

「唔緊要.....」

其實我根本一啲都冇介意，聽個阿叔既語氣就知佢嚟到講緊笑，所以我一啲都冇在意到。點解佢要咁在意呢？仲要將「唔好介意呀」呢句野講咗兩次。

「叔叔呀，呢個係我同學阿樑，佢話好想訪問下啲小店嗰，得唔得呀？」

「梗係得啦，阿玲男朋友既要求就等於阿玲既要求，我又點可以唔理呀？」

「阿叔！」

「哈哈.....」

喺呢一片笑聲中我真係有啲唔知點反應好，一方面我有得同呢間鋪頭做訪問當然覺得開心啦，但係似乎同一時間為阿玲佢帶嚟唔少麻煩，個心到覺得有啲唔好意思。

「係呢，你就係阿樑啦下話，你有乜野問題都可以問架，我地呢間鋪由我呀爺就開始營業，做到宜家已經好多年嚟.....」

就係咁樣我就開始咗我個訪問，而阿玲就喺旁邊坐嚟到聽，我諗佢就算同呢間文具店既人幾熟都好都

未試過咁認真聽佢地講歷史掛。個訪問大約進行咗一半個鐘左右，中途有下相，個阿叔又同我推介下邊啲文具係好用，邊啲唔好用咁，雖然我只係第一次同佢傾計，但係個感覺就好似同一個親戚傾計咁，個感覺好自然。

訪問完呢間文具店之後，阿玲佢又再次帶我去其他老店到去做唔同既訪問，好似係玩具店呀，舊書店之類。可能係阿玲帶住我既關係，嗰啲鋪頭既老闆都好願意同我做訪問，講下佢地既歷史。但係奇怪既係唔係點解每間店鋪既老闆都會不約而同咁誤會我同阿玲係情侶關係，搞到佢每次聽到都會面紅同向我道歉。訪問完最後一間鋪之後我就同阿玲佢一齊返去佢屋企間士多。

「今日真係好多謝你帶我行呀，如果冇你既我真係唔知點好。」

「唔...唔緊要.....」

「咁我走先啦，拜拜。」

「拜...拜.....」

同我道別既時候阿玲佢依然講野口窒窒咁，不過好奇怪，同我講野既時候佢先係咁，當佢頭先見到唔同店鋪老闆既時候講野就好流利，我諗大概係因為同我仲未好熟掛。

不過到底點解佢喺我面講野會口窒窒都係唔好諗住啦，既然宜家訪問既部分都做好曬，等我立即返屋企做好份Powerpoint等希文對我刮目相看，知道我都有心讀書，令到佢唔好咁憎我先。

我呢一次真係只許成功不許失敗，失敗咗既我罰自己日日嚟到背「許許許」10分鐘又點話！

真係好對唔住冇遲先至更新到

不過都係個句, 就算我幾遲更新都好, 我都唔會無啦啦放棄個故佢
希望大家可以繼續支持啦

(如果覺得好睇既不妨share比朋友睇, 如果有咩意見既不妨留個言啦)

第八章：Presentation真係好難呀

第八章：Presentation真係好難呀

要數我咁用心去做一份Project真係唔知係幾耐之前既事啦，由唔知幾時開始我做Project基本上就係會上網不停玩Copy & Paste，跟本就冇乜野係要自己親手去寫出嚟。就算係通識科嗰份IES啲問卷都係自己作既，返正都唔會有人分得到究竟係唔係真架啦。

不過今次又的確認真咗少少去做，雖然未必話個整成品一定係好好，但係至少我整完出嚟之後都幾滿意。我滿懷自信咁帶住我既整成品嚟Present嗰日既朝早返到學校，希望我地組既同學可以一齊Present埋我自己做好嘅一部分。唔知希文見到我咁落力去做會唔會原諒返我呢？

「希文，我尋晚整咗個.....」

「阿樑你嚟得啱啦，呢個就係我地組個Powerpoint，呢到就係你要講既部分，睇熟啲呀。」

「其實呢，我想話.....」

「仲想話啲咩呀？你成個Project咩都冇做過，宜家係唔係要你背少少稿都唔肯呀？」

見到希文一臉唔耐煩既樣，試問我又點敢去駁佢先得架。我呢個時候真好後悔點解自己唔一早同佢地講自己尋晚整個Powerpoint，搞到宜家比佢以為我咩都冇做過。不過我宜家後悔嚟都冇用，始終整好個Powerpoint先係最緊要。

「唔係呀你聽我講先啦.....」

「你又想諗啲唔知乜野解釋係唔係呀，解釋就即係掩飾，我都係唔想聽到你講野。我風紀嗰邊有野做，我都係走先。」

估唔到我連唯一一個機會去解釋都冇，到底我嘅希文心入面既印象係差成點呀？唉，事到如今唯有記熟啲份稿，等佢唔好咁憎我啦。至於我個Powerpoint.....有機會先拎比佢睇啦。

時間話咁就快去到我地要Present嘅堂，真係講都唔信，呢個時候我心入面埋沒咗好耐既嗰種Present之前既緊張感居然會浮現返出嚟，等我仲以為自己以後都唔會有呢種感覺添。

「下一組，佢地既主題就係灣仔既店舖歷史發展，各位同學要留心聽佢地講野呀。」

聽到老師咁講之後，我既緊張感居然立即提升咗唔知幾多倍，宜家成個腦變得一片空白，頭先好努力

去背既內容都一一忘記曬，唉，唯有睇下自己記得幾多得幾多啦。

但係可能因為呢一份緊張既感覺，搞到我都唔可以集中係個Presentation入面，我既專注力全部都放曬喺眼前其他同學既表情到。有啲同學就喺到玩手機，有啲就喺到訓覺咁.....總之聽既人就好少，不過其實我都幾明佢地既感受既。我地呢組既Powerpoint冇錯係就係圖文並茂，內容又叫豐富，之但係悶咗啲囉，佢地講既野基本上你求其Google下都會睇到，我地多既只不過係啲訪問既內容。

我一路望住同學既表情，然後再望一望老師個樣，見到佢對眼眉已經成咗「八」字形，睇嚟佢對我地呢組真係幾失望。

而我見到老師個樣咁之後就開始覺得呢個Presentation突然變得好漫長，長到我都唔係好頂得順。雖然話就話我地今次冇時間冇限制，但係我一望到老師個失望既表情就想快啲完，呢一種感覺真係好難受呀.....

時間唔知過咗幾耐，我地呢組終於都Present完，而老師喺呢個時候亦都開始想講出佢既評語。不過睇佢頭先咁既樣，睇怕個評語都唔方好得去邊，算啦，宜家件事會點發生根本就唔到我理。

「老實講希文你地呢一組真係令到我好失望。」

唉，真係冇估錯。

「你地既內容真係一啲新意都冇，到底你地有冇用心做過個Project架，咁既質素我求其上綱都睇到啦，仲需要你講比我知咩？」

我真係估唔到我諗既野同呢個老師諗既居然一樣。

「你地讀書的確係好叻，由其係你呀希文，但係做Project就唔同測驗，唔係話寫得多就會高分，你呢份野我幾乎可以比唔合格你地。」

唔係掛，唔合格會唔會誇張咗少少呀，我地都有離題，只係內容悶咗啲啫，唔洗去到唔合格咁大件事下話。

而喺我個心好不滿呢個老師既決定既時候，我忽然聽到身邊有少少好似索鼻水既聲，不過呢把聲唔係好大，幾乎要去到你耳邊先可以聽到。而喺呢一個時候，我輕輕咁拎個頭望向我聽到嗰把聲既方向，居然比我見到.....

第九章：腦筋急轉彎

第九章：腦筋急轉彎

就係呢一絲絲微微既聲音吸引咗我既注意力，當我一拎個頭過去旁邊既時候居然比我見到希文個鼻有啲泛紅，神情亦變得唔再好似平時咁從容自在，佢平時測驗都做得咁好，應該估唔到佢做Presentation會做到咁。

老師繼續講出佢既評語，佢每講一句，希文既心情就變得更差，個頭亦由望佢老師對眼慢慢咁望咗落去地下到，好似冇曬信心咁，而且鼻哥愈嚟愈紅，剛才聽到既索鼻水聲亦都愈嚟愈大聲，佢既情緒睇嚟唔係好穩定。我慢慢咁將個身移到去希文前面，希望大家唔會將注意力放喺佢身上，始終呢個都唔係一個好睇既表情。

不過宜家都有啦，如果比我一早知佢地整個Powerpoint係咁樣既我一定會叫停佢地囉。我嗰個就唔同呢，入面有之前同阿玲一齊去唔同既鋪頭到做訪問，就算你上網咁好彩見到有人訪問過佢地都唔會咁詳細囉。唔係嗎，如果拎我嗰個出嚟咪得囉？！

「老師，其實呢我地個Powerpoint仲有第二部分。」

「第二部分？」

呢個時候唔單止係老師，甚至係同我同組既其他人都呆咗咁望住我，就連本來好似就嚟要喊既希文都有再發出啲鼻水聲而碌大對眼望住我，搞到我突然之間有啲唔好意思。

「剛才我地比大家既只不過係灣仔好基本既資料嚟架啫，比大家對嗰到有啲基本概念呀嘛。宜家啲啲先係堅野嚟架，直情可以話係我地呢組人先至有既獨家猛料。」

「咁你快啲比我地睇啦。」

老師個表情立即由本來一副失落既樣突然變到宜家好期待既樣，雖然因為要開Powerpoint所以熄曬所有燈，之不過我都感覺到老師對眼好似發緊光咁。原來頭先既緊張感都只係算好皮毛，望到老師呢個咁期望既樣，搞到我緊張既感覺迅間提升到頂點，唔單止手心開始出汗，個頭仲開始有啲痛。

「喂阿樑，得唔得架？」

阿傑佢靜靜咁喺我耳邊問我，不過咁又難怪既，因為我自從訪問完就埋頭去整個Powerpoint，根本冇同佢地講過我做成點。

「冇事既，你地一陣喺旁邊配合我就得架啦。」

宜家諗返起，我都唔知點解自己可以一臉自信咁同佢講冇事，萬一老師又唔收貨既我真係唔知點算好。

我慢慢一步一步咁走去書包到拎出裝住我Powerpoint手指，插咗落班房部電腦到。雖然我仲未比組員睇過，稿都未度，所以試下以問問題既方式去Present，等同組既人問下我有關啲店鋪既問題，然後主要既內容就由我去講。其基本上所有組員都肯配合我既行動，但係唯獨希文佢一直靜靜咁企喺到。

今次既Present比頭先順利好多，至少老師個樣全程都好期待，直到我Present完之後全場同學都睇得好開心，老師亦對我地呢一組既評價亦同時升咗唔少。

「呢部分比起頭先有趣好多，真係唔錯。咁有請下組出嚟啦，希望下一組都做到頭先咁既水準啦。」

聽到呢一句之後我成個人都鬆咗一口氣，好彩今次過咗骨啫。就係我地慢慢由課室前面行返去自己個位既時候，希文佢行咗過嚟我到喺我耳邊細細聲咁講野。

「你放學之後留底，我有啲野要同你講。」

「嗯……」

呢次係自從拎咗三分既之後佢第一次主動同我講野，而佢講野時候既語氣並唔係好似之前咁比人一種絕情既感覺，而係有少少軟化，不過我又唔係好識點講出嚟……總之就係同之前唔同啦。

放學之後，我依佢所講留底喺課室到，眼見一個又一個同學離開學校返到屋企，我先發現原來自己從來都未見過呢一個景象，因為我之前一放學就會跑返屋企。最後差唔多全部人都走曬，得返我同埋希文留喺課室入面，之後佢慢慢行咗過嚟我既身邊，拋咗一支茶字典過嚟。

「請你飲架，飲啦。」

「嗯，多謝……」

「你個Powerpoint做得幾好呀，睇唔出你都可以做到咁好，明明之前只係考得三分。」

「嗯，我都估唔到啲老闆咁好人比我訪問啲。而且呢……」

真係好啦，睇嚟我地之間既氣氛好返好多啦，我今次既決定的確係冇錯既。講完之後，我扭開咗個樽蓋，開始飲佢比我既呢支茶字典。

「衰人。」

吓？！點解佢既語氣突然一百八十度變咗，仲要變返之前嗰種討厭我既語氣既？我聽到佢咁講之後幾乎連自己啱啱飲啲啖茶字典都噴咗出嚟。

「你其實係處心積慮特登整個咁好既Powerpoint之後等我Present完我嗰個既時候出嚟串我係唔係呢？知道自己可以同啲老闆做啲咁深入既訪問，而我就只可以喺問到啲好皮毛既野，你心裡面一定係到暗爽緊啦係唔係呀。我真係點都估唔到原來你係個咁既人嚟呀！」

唔係掛，點解佢會點諗我架？！我真係一心一意諗住做好個Project，點會諗到原來咁做會令到你個心入面係咁諗先得架？

「你知唔知咁做只會令到我心入面更加唔中意你架啫！一諗返起今日見到你突然之間咁有型係到做個Presentation 我真係好想拎條繩將你吊起嚟打到你變豬頭丙呀！」

「對唔住呀！我真係咁冇心架！我只係想做好個Project，冇其他意思架！對唔住呀，對唔住呀，對……」

其實我都唔知自己做錯啲乜，之不過我諗唔到除咗道歉之外仲可以做到啲乜。

而係我不斷底頭道歉既時候忽然聽到一下「撲」既聲，雖然唔係話好大聲，但係足以令我好清楚咁聽到。我慢慢咁抬起頭，居然比我見到希文佢個樣由本來既嬬樣又回復去一個好開朗既表情，好耐冇見既笑容亦再現眼前。

「撲，哈哈哈哈哈……」

望住呢個只係不停咁笑既希文，我真係完全唔知道應該點反應至好。

「哈哈，我哋你啫，我哋你啫，蠢材，嘻。今次就放過你啦。我知其實你都係為咗我地呢組啫。而且……」

「而且？」

「而且係我比老師講到就嚟喊既時候你居然主動行嚟我面前，呢啲其實我係知既。」

「其實呢...呀...呀，我只係咁啱想行前啲聽下老師講咩之嘛……咁……」

「不過我最開心都係見到你用心去做呢個Project，我要收返之前嗰句說話，我宜家一啲都唔憎你。」

佢講完呢句野之後單起隻眼，伸一伸條脷，呢個絕對係我識佢開始到宜家最可愛既動作，望到呢個動作之後我都唔知點做好，而且我又發現自己塊面變得好熱，成個腦又變得一片空白，冇幾耐希文佢都一樣面紅起嚟，課室入面又回復返一片寧靜。但係接住落嚟既就係呢一片寧靜絕對冇令人感到有一絲既不安，但係令到我地覺得有一種安全既感覺.....

呢個時候我就好似不控制唔到自己既身體咁慢慢哄個頭過去希文到，而希文都係一樣。

「衰...衰人，做咩哄個頭嚟呀.....」

「我...我都唔知呀.....但係你...你又點呀.....」

「你...你行開啦.....」

「你唔...行.....」

雖然我地兩個都講出啲咁既說話，但係我地兩個都冇縮返個頭既意思，反而我地兩個塊面變得愈嚟愈近，我地既嘴唇亦都一樣.....

「喂，同學做咩你地仲唔走呀？我地校工要汁野啦。」

就係呢個校工既一句說話將我地之間既氣氛一下子衝散咗，我同希文就好似如夢初醒咁望住對方。之後佢就用九秒九既速度推開我之後立即拎走佢個書包離開課室返屋企，而我就留埋係原位到呆咗唔知做咩好。

不過其實細心諗下，希文佢應該原諒咗我啦掛。只要一諗到呢點，我就會不其然變得好開心，不自覺咁笑出嚟。

「喂走啦同學，做乜嚟到傻笑呀.....」

呢個校工又用一句說話將呢到既氣氛衝散咗。

最近開始mid-term, 開始要努力溫書, 所以唔記得咗呢到, sorry
真係希望大家比下comment, 因為乜comment都冇個感覺好空虛 :(
最近諗緊之前嗰篇<情人節那天·我在衣櫃中找到我生命中的天使> 可能會喺聖誕節出個特別篇,
不過內容就仲未諗好, 雖然係咁, 我都好希望大家多多支持

第十章：雨一直下，氣氛有點融洽

第十章：雨一直下，氣氛有點融洽

就係多得呢次既Presentation作為一個契機，令到我同希文既關係又回復到之前一樣咁，不過其實都唔係完全一樣既，最起碼我一定要比啲心機去讀書，如果唔係佢就一定好似之前咁憎我。

時間話咁快嚟到十一月，估唔到我同希文既關係會由一場雨開始演變到去另一個關係。

自從Presentation之後，我同希文一齊既時間大大增加咗唔少，係唔係好妒忌呢？不過你地唔好誤會呀，我地唔係你地諗咁架。因為希文知道我已經成半年冇掂過啲書，所以佢先主動抽時間嚟同我一對一溫書，冇咩特別架。不過其實我地又唔單止係去溫書既，仲有.....去補習囉，個個人都捧到個DSE咁鬼重要，咁我當然都要去吓補習啦。

今日係星期五，我地放學之後諗住一齊去補習社到上堂。雖然我之前試過上網睇下有關補習既野，之不過我見到啲論壇Post淨係一味講啲乜野亞古獸，基爾獸咁，唔講我真係以為自己睇緊啲數碼精靈既大圖鑑呀。最後當我問希文有冇乜野好介紹既時候佢就同我講不如一齊去同一個老師到上堂，佢笑笑口咁話佢介紹我去既兩個人都有半價啲，聽到啲咁既消息我梗係去啦。呀，不過宜家諗返起佢當時笑得好特別，好似唔單止住為咗有半價而開心啲，不過算啦，可能係我諗多咗架啫。

咁耐以嚟我都有補過習既，返正我都有認真讀過書，比我去上補習班仲唔係曬錢咩，而且補習呢啲野又唔係上咗堂就學識既，見到我以前啲中六同學個個拎住啲筆記喺到自High個樣我真係點都諗唔明。如果唔係有心學野就咪去啦，咁同政府講既大曬鬼有咩分別呀。

不過一上堂就真係比個補習老師嚇親，我唔係諗住話補習有幾好幾好，之不過同學校啲真係完全兩碼子囉，唔好話乜野筆記好唔好，只係單單講解內容呢方面已經教學校既老師望塵莫及啦。好似地理科講既乜野地震既形成，我喺學校學咗成個星期都唔係好明，但係呢個補習老師只係用咗十五分鐘就講完，仲要係好清晰啲種。當然我唔係咁片面話學校啲老師冇用，始終佢地既工作唔止係教書，仲有學校啲事務等等，不過而家每次我諗起個樣我都不自覺咁嘆咗一口氣。

喺補完習之後我同希文都會行路返屋企，始終補習社距離屋企唔係好遠，而且我地一齊行仲可以傾多一陣計添。不過今日我地上完堂之後居然個天落起雨嚟，老實講我唔太中意落雨，因為真係會好麻煩。

「喂希文，不如一齊返去囉？」

「唔啦.....」

「點解唔呀，平時都一齊行架。」

「唔...唔好問啦.....」

講完呢句之後，希文佢立即將個書包放喺個頭到，深深吸一口氣之後衝咗出去，睇嚟佢好似無帶遮咁。我立即打開自己把遮然後衝咗出去，廢時希文比雨淋濕。

「希文你做咩呀，冇帶遮咪同我講囉，嗱，我地一齊行啦。」

我咁樣講完之後，希文佢冇再好似頭先喺到跑，而係靜靜企咗係到，低頭望住個地下。

「點解要跑得咁快呀？」

「我...我唔...唔...唔記得帶遮.....」

「唔記得帶遮咪同我講囉，我地可以一齊遮，洗乜要咁跑出去呀？」

「因...因為冇帶遮實在好癩呀嘛.....而且我仲要用男仔擔同一把.....」

「冇乜好癩呀！如果你遲啲病咗既話你唔覺得係仲癩咩？」

我諗呢次係我識佢咁耐以嚟最大聲同佢講野既一次，之不過我覺得咁大聲先可以叫得到佢。希文聽完我講之後好似想即刻反駁我，但係佢好似一時想開口之後又欲言又止，我諗佢大約係諗唔到有咩反駁我既地方掛。

「咁...咁...唔該曬你啲.....」

就像咁我地就喺呢個雨天到我地兩個就擔住同一把遮行返屋企，雖然話就話係我主動約希文同我擔同一遮，之不過我都估唔到旁邊既人都係咁望住我地兩個，搞到我同希文都有啲唔好意思。我地沿途一路都冇講野，但係情況同之前做資料搜集之後唔同，冇講野唔係因為佢又嬲咗我，而係我地兩個都唔知講咩好。

「你...你點呀，冇冇淋到？」

我希望可以打破呢個咁尷尬既氣氛，但係唔知應該點做好，所以先求其問一句好普通既問題，但係似乎我呢個問題並冇發揮到我心目中既作用，返而令到我地之間既尷尬轉換到另一種層次。

冇幾耐之後，希文望一望我，發現我為咗唔好比佢淋濕而將把遮傾向佢到，而我左邊既膀頭就因為把遮唔夠大既問題而比雨水淋濕咗，然後將個身慢慢咁挨落我到，對手就攬住我。呢個時候個感覺到右邊既心口有種比軟軟地既野壓住既感覺，搞到我個心跳得愈嚟愈快，緊張到我都唔知望唔望希文好。

「唔...唔好誤會呀，我...我只係唔想你淋到病咗啫，你知你都有咩時間去溫書架啦，仲邊有時間病呀。你...你唔好亂諗野呀！」

「我邊有亂諗野啲。」

大佬，你壓到個身咁埋，我緊張到幾乎唔記得呼吸添啦，仲邊有心情同時間可以亂諗野呀。

「轟隆！」

突然個天響起一聲好大聲既雷聲，大聲到好似行過啲冷氣機房咁。乜野叫做人面獸.....唔係，乜野叫做震耳欲聾呢，睇怕呢一個雷聲既係最好既示範啦。

「呀！」

聽到呢一下雷聲之後，希文佢立即尖叫出聲，然後將本來攬住我個對手由本來只係好普通放係我膀頭到變成宜家緊緊咁攬實我，咁當然佢既心口亦變得更加貼近我，令到我更加體會到佢既體溫。呢個時候既我比起頭先更加唔識得點樣去做反應，唯有行快少少。明明補習社距離屋企唔係好遠，但係今日條路比我既感覺真係長過萬里長城呀，最後幾經辛苦先至送到希文返到佢樓下。

「多...多謝你呀.....拜拜。」

見到佢面紅紅咁講完拜拜之後就立即跑返上樓，我先至鬆返一口氣行返屋企。呢一場特如奇來既雨，應該令到我同佢之間既關係變得更加親近掛？至少我係諗.....

我都知自己出文既時間係好鬼慢，但係都好希望大家可以體諒 :)
出文既速度暫時都會係一至兩個星期一篇，我諗sem break既時候應該會快返掛.....
最近身體都唔係太好，天氣一轉就病咗成個星期，宜家都仲有一大堆Project同Present等緊我，唉.....
最後都係嗰句：覺得個故有趣既話記住要share比朋友睇同埋留個comment呀！

第十一章：世界大戰抹黑宇宙了 Can you feel

第十一章：世界大戰抹黑宇宙了 Can you feel

就喺落完雨之後嗰日，我地成組人一齊去到希文屋企到開一個溫書會，因為佢屋企人都因為工作關係去咗外地工幹，所以全間屋得返我地幾個。但係子軒同卓珊都因為大事嚟唔到，最後得返我同阿傑兩個人上希文嗰到。

我地開頭都好比我機溫書，但係點知只係溫咗一陣之後我地就開始變得心散。不過其實我都唔想架，鬼叫啲題目咁難咩？望住一睇唔明既野，喺人都知道會覺得眼訓架啦，下話？我不停用呢一啲藉口令自己心散變得合理化。

「哎呀，點解啲題目咁難架？」

「希文你都唔識做呀，咁我地就真係玩完架啦。」

「咁我都可以唔識架嘛，唔怕啦，最多我地聽日返去問老師囉。」

「唯有咁啦。」

「阿樑，你話如果我地一遇到難題既時候有個天使出嚟幫我地解決困難既話你話幾好呢。」

「阿傑你喺到FF啲乜野呀？與其喺到諗點樣搵個天使出嚟，不如我地都係現實啲諗下點解決眼前呢啲書先啦。」

雖然我表面上係講到咁正氣，但係事實上我咪又係喺到亂諗野冇用心溫書，唉.....不過如果真係有天使既話又會喺邊到出嚟呢？喺個窗到飛入嚟？喺電視到爬出嚟？定係好求其咁喺個衣櫃到走出嚟呢？算啦，我諗嚟都係無謂架啦.....

「唉，都五點啦，我都係返屋企先。」

「吓，阿傑你咁快就走啦？」

「冇辦法啦，我個心始終喺今日新出個集漫畫到呀，等我下次先溫啦，拜拜。」

喺我同希文都仲未趕得切同阿傑佢講再見既時候佢就走咗，到底漫畫既吸引力係唔咁大呀？我都幾中意睇漫畫既，不過我未去到為咗追漫畫而唔溫書囉。不過講就係咁講啫，阿傑都走咗既話咁即係得返我同希文兩個人喺到，我心入面又真係幾開心既，但一諗到而家孤男寡女共處一室，搞到我又有啲緊張啫，呢啲就真係叫做百感交雜啦。

「唉，我覺得好眼訓呀，都係訓陣先。阿樑你有乜野唔識就等我起身先答你啦。」

講完呢句之後，希文佢話咁快就僕左喺枱面到，靜靜咁喺我面前走咗去陪周公玩。

希文你咁做係有心定係有意呀？孤男寡女共處一室既情況下你仲要喺個男仔面前訓覺？！唔通你真係唔怕我趁你喺訓覺既時候「咩」咗你架？我知啦，你一定係想試下我幾有定力係唔係呢？

放心啦希文，我一定控制得到自己.....我忍唔住啦。

見到希文訓覺嗰時合理對眼，塊面紅卜卜咁，細細既嘴唇又毫無防範，真係迫我想入非非架啫。唔得既，我點可以喺呢個時偷襲架，咁樣做好cheap啫；但係又唔係嗰，既然佢明知呢到得返我地兩個佢都夠膽喺到訓，即係其實佢都預咗我咁做架啦；不過唔得既，咁做又真係卑鄙咗啲嗰.....

我個腦入面幾乎分裂出兩個人格，而兩個人格幾乎喺到展開世界大戰抹黑宇宙了，我feel到成個人好煩囉。當我不停去思考應該點做既時候我已經發現自己個頭經已哄到希文面前。

當我哄到咁埋既時候，我更加可以細心咁望住希文。唔單止咁，哄到咁埋既時候我仲可以微微感受到佢既體溫，同埋聽到佢訓覺時候既抖氣聲。

咪...咪住先，點解我呢個時候會諗埋曬啲咁既野架？！我頭先咁樣既行為真係同一個變態佬差唔多囉！

我同自己僅餘既理性控制自己對手禁住張枱，將自己個頭拉翻返嚟。

但係唔係嗰，呢到又有其他人，而且我只係會輕輕掂一掂佢既嘴唇啫，除咗我之外唔會有人知既.....

一諗到呢到除咗我之外就冇人知既時候，我僅餘既理性話咁快就輸咗.....

話咁快我個頭又再次哄到去希文既面前。希文呀希文，你塊面其實係唔係有尼古丁定唔知乜架，點解會令人愈望愈上癮既？！就係咁我個頭就愈嚟愈哄得埋，愈嚟愈埋，愈嚟愈埋，我地兩個既嘴亦都就嚟近到可以掂到。

「樑.....阿.....樑.....樑.....」

希文突然之間開口講野。死啦，我實係比佢發現咗啦，今次真係水洗都唔清啦.....

今次又咁遲先更新真係好唔好意思，
因為一到sem尾就好多project同present等住我.....我唯有希望大家體諒我啦 :(

不過我有一件事要宣佈,
就係呢個故事會「無限期」停止更新。
點解我要咁做呢? 係因為project同present完咗就會到final exam, 唉, 都唔知要chur到幾時
而考完final之後我諗住試下幫之前<情人節那天, 我在衣櫃中找到我生命中的天使>寫返個外傳, 所
以唔知幾時先會寫返呢個故
不過放心, 我只係停止更新, 唔代表我放棄呢個故, 我估呢個所謂既「無限期」會係一兩個月到啦。

最後都係例牌講返句: 「如果大家中意呢個故既話一妨comment同埋share 比朋友睇啦:)。」

(題外話, 我覺得高登最近個認證真係好鬼煩, 我幾乎比佢搞到冇咗個account, 搞到我以後唔可以喺
高登出故, 好彩最後都有事。)

第十二章：FF得太多會好傷身架

第十二章：FF得太多會好傷身架

「樑.....阿樑.....樑.....」

點解希文佢無啦啦會叫我個名架？佢唔係發現咗我頭先既行動下話？！

「唔...唔.....唔係你咁諗架，即係.....呀...呀...呀.....」

死啦，無啦啦比你叫一叫我個名，搞到我個腦宜家一直空白，完全諗唔到點樣解釋至好。

「樑.....樑.....好.....好樑.....」

「好樑？」

「好涼呀.....點解屋企凍咗咁多架？」

好涼？唔係下話？雖然宜家係十一月個天涼咗少少啫，但係都未至於係凍掛，更何況你屋企都開咗暖氣啦喎，照計就唔會咁架。

就喺希文佢不斷咁講好涼好涼既時候，不知不覺間我呢位正覺得熱血沸騰既少年既心都冷卻咗落嚟，慢慢將個頭由希文面前抽返出嚟。

原來當人變得冷靜既時候唔單止思路會變得清晰，視野都會隨之變得廣闊。當我由本來幾乎面貼面既距離拉到去約30cm左右，就發現希文佢塊面唔係一般既紅。呢點我可以好肯定，始終我喺學期頭每一日返學都係為咗望佢嘛。無幾耐，我仲發現佢成個人開始喺到打震，震得仲要有啲誇張。我輕輕伸手去摸一摸希文既前額，居然感覺到非一般既熱，好明顯佢發緊燒，仲要嚴重到佢自己都有發現。

「咁熱既？喂，你發緊燒呀？」

「我都唔知呀.....」

「唔知？！你屋企有冇探熱針呀？」

「有呀.....係.....係...電視個鬼！」

「唔好打克痴住啦，咩電視個鬼呀？」

「電視個櫃呀，咪咁快問我啦。」

「得啦，你都係快啲返去床到訓住先啦。」

希文佢好似用盡全身既力氣去點咗一下頭，然後由客廳走咗返佢自己間房，今次係我第一次見到佢喺我面前展示佢最柔弱既一面。

我係咁睇到底個電影櫃到有啲乜，真係估唔到希文平時睇落係一個咁企理既人，呢到啲野居然可以亂到咁。搵下搵下，幾經辛苦終於比我搵到支探熱針啦。支探熱針到有個好可愛既小熊維尼公仔喺到，始終佢都係一個女仔，就算喺人地眼前佢係幾成熟都好，都應該中意呢啲可愛既野掛？一諗到呢我個心入面湧現咗一種莫名既喜悅。咪住先，我喺到諗緊啲乜野呀？呢啲時候邊可以曬時間諗呢啲野架，都係快啲拎入佢間房間啦。

「我搵到探熱針啦，嗱。」

「唔好意思呀阿樑，我宜家覺得好唔舒服呀，可唔可以幫我探呀。」

你擺到一副咁柔弱既表情，好明顯我冇拒絕既餘地啦。呀，不過話時話，到底支野係點用既呢？有冇分乜野口探定腋探架呢？如果係口探既我洗唔洗消毒先呀？始終呢支野都係好求其咁放咗喺個電視櫃到，可能好污糟架啫。不過如果係腋探既話就冇需要考慮呢點啦。啱啦，一於腋探啦，反正咁做會比較方便，只係拉開佢件衫就搞掂。

咪住先，拉開佢件衫？！咁我咪有幾會見到...唔止，仲有機會掂到佢心口個對.....

一諗到呢點，本來冷靜返既我，唔理上身定下身都一樣再次熱血沸騰起嚟，腦入面迅間諗返起平時上網睇到既野，仲要喺我腦入面用1080p咁播緊出嚟。

咪住先，我認自己係一個成長得好健全既年輕人，思想上有時係中意偏向咁一方面既，之不過我都唔應該咁衝動既，不如我都係細心啲睇下支探針上面有冇寫啲乜野啦。

就喺我放眼於成支探熱針，唔再只係望住個小熊維尼圖案既時候居然真係比我望到支探熱針既背後好清晰咁寫咗佢既用法。

「肛採用」

嗚呀，見到呢幾隻字我真係幾乎噴血都似。人地唔係成日話乜野「一鼓作氣，再而衰，三而竭」架咩？點解由口探諗到去肛探係一浪比一浪更加有衝擊力架？我宜家腦入面唔單止淨係用1080p播緊畫面咁簡單，仲要開緊5.1還個立體聲播緊出嚟呀！

「呀...好辛苦呀...阿樑...快啲幫我啦...快啲.....」

希文佢成個一縮喺被窩入面，依舊合理對眼，慢慢咁講出希望我幫佢探熱。但係點解個感覺好似好饑渴咁既？！

唉，死就死啦！呢鋪真係「一股作戲，再而衰，衫已揭」囉。

就係咁，我手震震拎住支探熱針慢慢行到希文身邊準備幫佢探熱。明明我地只係得嗰幾步距離，但係我真係一步一驚心。正當我行到去佢床邊既時候，佢再次張開佢既嘴巴。

「唔...唔係呢支探熱血針呀，呢支係我BB個時用，你睇清楚...個櫃啦，應...應該有支探耳仔架.....」

呢完呢句之後，我急急腳走返去個電視櫃到望，點知真係喺我頭先拎到支探熱針既旁邊發現咗一個平時耳仔用既探熱器。我輕輕咁放返底頭先支探熱針，耷底頭，腦入面既1080p同5.1都立即消失咗，我真係不得不承認自己好容易比一啲野衝昏頭腦。我嗶嗶臨拎個探熱器去幫希文探熱，呀，佢真係發燒啦。

「你真係發燒嘞，你屋企有冇退燒藥呀？」

「藥呀.....我諗.....電...電視.....」

經歷咗頭先探熱器呢件事之後，我成個人清醒到一個極點，喺佢諗住講個「櫃」字之前我已經走返去嗰個亂葬崗既電視櫃到拎咗一包幸福必理素出嚟，倒咗杯水出嚟餵希文食藥。

不過食完藥之後都唔會立即退燒既，由得佢個人保持咁高溫都唔係一個好辦法。正當我諗住問佢有冇小萌退熱貼嗰陣，佢再次走咗去搵周公。

咁無辦法啦，事到如今我唯有用返最傳統既方法啦，就係用濕毛巾。

我慢慢咁將一條濕毛巾放喺佢淡紅色既額頭到，我一放嗰下就發展希文佢面上展示出一副好舒服既笑容。我輕輕用食指微微撥動佢面頰旁既黑色秀髮，點知佢居然一手將我隻食指捉住。雖然捉住既力度唔係話好大，之不過呢一下實在嚟得太突然，令到我唔知點樣縮返隻手至好，唯有由得佢捉住我隻手。

比佢捉住隻手指既我，走開又唔係，叫醒佢又好似唔多好咁，最後唯有靜靜咁坐喺佢既身邊。望住比佢捉住既嗰隻手指，我開始喺到諗呢次好似就係由開學到宜家識咗佢都算係第一次同佢拖到手掛，雖然未必係佢突登咁做，但係個感覺又幾特別.....

我一個人坐喺希文既旁邊，除咗望住佢之外就唔知做乜野好，我漸漸覺得對眼皮好似愈嚟愈重，我都唔知幾時開始連自己訓著咗。到我醒返既時候，我發現自己既旁邊既床到已經冇人喺到，而我兩隻手都冇比任何野捉住。

我望一望個鐘，原來已經九點。

死啦，明明只係同屋企人講我只係去同學屋企溫下書，但係到九點都返，實唔知有咩事啦，呢次點解釋好呀？

正當我個心不斷喺到諗唔知點樣至好既時候，忽然聞到客廳到傳嚟好香既味道，似乎係有人煮咗啲好食既野。我離開已經坐到暖曬既凳走到開住黃色燈泡光芒籠罩住既客廳，第一眼望到既就係著住圍裙既希文喺到捧住一煲奶白色既忌廉湯。

「咦，你起身啦，老公？」

嘩唔好意思呀，咁遲先可以更新，我諗之後會再努力啲寫架啦，
雖然我都唔知會唔會更新得好密，但係希望大家繼續支持呢個故啦：)